

哈密志卷之三

輿地志一

沿革

哈密乃古匈奴國屬域

伊吾在敦煌北大磧外自昔為域外地不在九州之限

漢武帝開設河西四郡曾遣將出兵於此伐破匈奴然未有建置戍兵其後仍為匈奴所據

漢明帝始取其地為屯田鎮戍之所未置郡縣後魏始置伊吾郡後又為外域所據

唐貞觀四年內附置西伊州六年改為伊州

天寶初曰伊吾郡五代時號胡廬磧小月氏遺種居之

宋時土人陳氏據其地元族屬忽納失里封威武王居此尋改封肅王卒弟安克帖木兒嗣

明永樂元年遣使入貢明年設哈密衛改封安

克帖木兒為忠順王其部落有回回畏兀兒哈喇灰三種皆領以都督統於王哈密居諸衛最西為西域噤喉中華拱衛凡諸番入貢必哈密譯其文乃發以故特重安克帖木兒立一年卒無子兄子脫脫嗣王九年卒封脫脫從弟免力帖木兒為忠義王

宣德元年卒以脫脫子卜荅失里嗣王仍稱忠順以幼故仍立忠義王子脫歡帖木兒為忠義

王共守其國

正統四年忠義王卒子哈力速魯壇嗣別名倒瓦荅失里無何反刺攻哈密劫王及王母去哈密自是畏兀刺稍貳於中國

天順元年卒弟卜列革嗣

八年卒世絕王母弩溫荅失里署國事詔以故忠順王脫歡帖木兒外孫把塔木兒為右都督守哈密死子罕慎嗣

成化九年土魯番強控弦可五萬其長速壇阿力尤勇黠速壇華言王也攻破哈密執王母去罕慎竄苦峪城詔都督同知李文討之至則調赤斤罕東兵數千駐苦峪旋罷還阿力益橫

十四年阿力死子阿黑麻嗣

十八年罕慎入哈密

宏治元年阿黑麻亦壯詐殺罕慎請代領西域不許求忠順近屬安定王裔孫陝巴為嗣

四年土魯番以哈密來歸明年封陝巴為忠順王入哈密又以頭目奄克字木刺阿木郎輔之阿黑麻復乘間攻殺阿木郎執陝巴去詔以部長寫亦虎僊為都督轄三種部落奄克字木刺為之長如罕慎故事阿黑麻遂稱可汗畧罕東諸衛聲言攻肅州蹂甘州

七年閉嘉峪關絕西域貢令怨阿黑麻時阿黑麻已西還留四百騎據哈密

八年肅州撫彝指揮楊翥言罕東有徑路達哈
密不旬日至襲之必克宜以罕東為先鋒我兵
繼之樞臣馬文升以為然於是撫臣許進奉詔
使河西別將彭清以三千騎往結罕東既而師
至肅州遲罕東兵不至乃循大路行乏水草騎
不得逞番將牙蘭覘知遁去遂入哈密時哈密
之人久苦兵困甚不能支盡焚其廬舍內徙肅
州先是奄克亭木剌并其人亦寄居赤斤守臣

并為之請居苦峪給牛種耕牧

九年土魯番復據哈密

十年阿黑麻以絕貢失互市窘乞歸陝巴貢如

舊

十二年陝巴還哈密阿黑麻尋死子滿速兒嗣

十七年哈密人逐陝巴以真帖木兒守哈密是

年陝巴復還真帖木兒入居甘州

正德元年陝巴卒子拜牙郎嗣滿速兒逐之使

其將火只他丁守其地尋復還哈密拜牙郎仍守之

七年真帖木兒還土魯番

八年拜牙郎棄哈密走降土魯番

十年土魯番復歸哈密

十一年仍奪據之入為寇逼肅州城下敗去諸將又追敗之於瓜州滿速兒復詐請和

嘉靖三年入犯甘州撫臣陳九疇敗却之又敗

之於肅州時哈密已殘破餘衆千餘人走入塞守臣撫存之歲給耕種

四年曲先叛入牙木蘭附土魯番土魯番仍據哈密犯肅州又入沙州

七年牙木蘭來降

八年土魯番復犯肅州擊走旋又請歸哈密廷議言哈密難守不宜復詹事霍韜力言置哈密者所以離兩部之交外領西域內蔽邊郡不可

失也樞臣胡世寧力主棄之時滿達兒入貢遂
以哈密來歸然亦竟不能有也

二十五年復為土魯番馬黑麻所據哈密諸部
訛吉孛刺等所耕牧河西仍襲故爵

蓋邊備不修自楊翥議棄以後數十年中無能
以一騎踰關而西者使土魯番縱橫坐大殘滅
與國為可憤也其後屬土魯番猶令比歲一貢
迨隆慶萬曆間猶入貢不絕然自後首領竟係

土魯番回子非復元裔矣自

本朝定鼎四夷咸臣哈密回長奉

貢於順治年間歸順

王化編設佐領是以乾隆年間

欽定外藩蒙古回部王公表傳以載其哈密事蹟

表傳曰哈密回部在嘉峪關外至

京師七千一百八十里東界喀爾喀西界吐魯

番南至沙磧北至天山界巴里坤邑十有三曰

蘇們哈爾輝曰阿思塔納曰托和齊曰拉卜楚
哈曰喀喇都伯曰格子烟墩曰星星砭曰下莫
艾曰上莫艾曰塔勒納沁曰半池泉曰柳樹泉
曰博羅特口皆哈密屬漢為伊吾廬地唐宋稱
伊州元始稱哈密明如之其地皆纏頭回種今
設札薩克領之回人錯居西域以天方為祖國
或城郭處或逐水草徙稱花門種相傳祖瑪哈
麻教以事天為本重殺不食犬豕肉嘗以白布
蒙頭故稱曰纏頭回又稱白帽回回人自呼白
帽曰達斯塔爾別有紅帽回輝和爾哈拉回諸
族然以纏頭回為著札薩克居哈密舊城戶十
設甲長一別置官兵七百屯哈密新城及塔勒
納沁以駐防大臣領之順治四年甘肅巡撫張
尚奏哈密衛輝和爾都督及赤金蒙古衛都督
永柱等明入貢值寇掠初印羈肅州今赴臣所
乞糧願効忠

天朝

詔納之六年河西逆回丁國棟等煽哈密及吐魯番部
掠內地民偽立哈密巴拜汗子土倫泰為王據
肅州叛集纏頭回紅帽回輝和爾哈拉回漢回
等數千分置都督大軍討之抵肅州擊斬哈密
頭目塔什蘭及纏頭漢回四百餘級以雲梯夜
薄城奪門入斬土倫泰及纏頭漢回二千餘賊
壘垣拒隕之擒丁國棟斬哈密偽都督和卓哈
資纏頭回偽都督琥伯峰哈拉回偽都督茂什
爾瑪密輝和爾偽都督瑋瑚哩偽左都督帖密
卜喇紅帽回偽右都督恩克特默等八年回目
克拜至嘉峪關稱哈密使請通貢甘肅提督張
勇責盡歸內地民乃可十二年克拜齎葉爾羌
表至稱哈密巴拜汗為葉爾羌阿布都喇汗所
禁獻內地民請罪

詔納之康熙十八年張勇謀噶勒丹襲哈密以

聞

詔設備邊汛噶勒丹懼不至尋與兄子策妄阿喇布坦
修怨策妄阿喇布坦牧博囉塔拉噶勒丹牧阿
爾台哈密居其間畏準噶爾威強事之三十二

年

遣使博囉塔拉道哈密為噶勒丹屬所戕

上以哈密鄰塞賊境乘虛警或不及備

詔昭武將軍郎坦屯甘肅會軍所擒纏頭回卒以噶勒

丹徒科布多三遣使乞糧哈密告郎坦請勦噶
勒丹及哈密

遣護軍統領蘇丹等往議尋奏郎坦議大軍屯甘肅噶
勒丹必不敢越哈密若聽耕牧久將為邊患應
於年內運糧至嘉峪關來春設站固壘酌留兵
哈密以大軍進科布多倘噶勒丹由科布多遁
大軍歸哈密取禾平城絕準噶爾所恃產蘇丹
等議噶勒丹無定牧大軍趨科布多或不值哈

密隸噶勒丹久遠勦之非所以體

好生仁請釋回卒歸給糧騎檄所部知

朝廷德意

詔如蘇丹等議三十五年噶勒丹為大軍敗遁集所私
議取糧哈密副都統阿南達設哨布隆吉爾巴
里坤塔勒納沁都爾博勒津諸路值哈密達爾
漢伯克額貝都拉使奉降表至嘉峪關遣告所
部曰噶勒丹若竄爾境其擒獻否則以告倘私

給噶勒丹糧騎或助之他適爾降表不足信矣
噶勒丹以虐哈密故懼襲已且聞大軍嚴備不
果赴三十六年哈密俘噶勒丹子色布騰巴勒
珠爾及其屬以獻噶勒丹尋自殺額貝都拉表

請

頒勅印

賜旗纛令吐魯番葉爾羌聞之皆知榮矢世保疆圉復
以哈密民酌置肅州為朝覲往來便貢使至肅

州令得乘驛入都

上念哈密內附誠

詔以額貝都拉轄之給札薩克

勅印

賜紅纛子郭帕伯克率所部百人屯肅州貢使乘驛額

十五年三十七年

遣官赴哈密編旗隊設管旗章京副管旗章京參佐領

驍騎校各員肅州別設佐領一復以哈密市甘

肅便

詔勿禁三十九年所部領哈薩克布魯特讐策妄阿喇

布坦將興兵爭喀什噶爾以告

詔不時偵奏而策妄阿拉布坦憾哈密擒獻噶勒丹子

故掠其屬赴市吐魯番者

詔責策妄阿拉布坦罪準噶爾怨哈密甚五十四年遣

兵二千襲哈密掠北寨五抵城我駐防兵二百

率回卒奮擊斬九十級擒三人賊退屯城南聞

肅州援至遁

頒賜銀萬五千及粟米牛羊贍哈密衆有佐領色柏爾者俘獻準噶爾賊以秋將復襲告

獎賜章服銀幣

諭曰哈密編設佐領無異內地安可置之不問

遣大軍屯巴里坤防禦準噶爾復

詔運糧貯哈密以肅州佐領為導五十五年富寧安奏

哈密屬之布魯爾圖古哩克接壤地并巴里坤

都爾博勒津哈拉烏蘇及西吉木達里圖布隆

吉爾附近之上浦下浦等處地可耕請募兵興

屯

上可其奏五十八年奏巴里坤至哈密站舊各設馬準

噶爾使及降人至乘巴里坤站馬至哈密又自

哈密札薩克所撥馬送布隆吉爾今歸附者衆

馬不給請於巴里坤站增馬五十哈密站增馬

八十從之六十一年議興屯吐魯番遣哈密回

民助役雍正三年撤大軍還四年王大臣等議
駐防哈密兵止五百準噶爾賊或來間盜駝馬
請撥安西鎮標兵五百往仍留嘉峪關至哈密
軍站備不虞

詔如議理藩院奏哈密來朝廩給限四旬叅佐領等給
緞布有差從之七年大軍復屯巴里坤議墾哈
密及塔勒納沁地八年穫麥青稞六千四百石
嗣歲給穀種五百石秋納糧四千石每石給銀

一兩九年寧遠大將軍岳鍾琪諜哈密屬漏師
準噶爾且導掠巴里坤駝馬以告

諭曰哈密雖不可信然亦當諒其苦情久遭準噶爾凌
虐恨之入骨畏之如虎或偶通信於賊不過為將來
自全計我軍固不可不加意隄防然亦不可使有疑
懼心大軍力能庇護哈密哈密自不為賊所用矣十
年噶勒丹策凌遣將色布騰車凌納木札勒等
由烏克克嶺西喇呼魯蘇分兵襲哈密及塔勒

納沁回衆拒之乞援岳鍾琪軍鍾琪檄總兵曹
勦趨輝魯圖達巴罕五堡復慮賊由摩拔圖圖
爾庫勒竄北山檄副將軍石雲倬設伏巴罕溫
度爾署鎮海將軍卓鼐設伏察罕春集副將軍
常賚赴烏克克嶺截賊竄路曹勦軍抵二堡遇
賊五千餘奮擊之賊由烏克克嶺越塔呼納呼

遁

諭曰哈密被賊侵擾回民并力抵禦甚屬可嘉聞其城

外牧放牲畜一時不及收回者被賊盜去雖據報賊
遁後仍將牲畜奪回但恐遺失倒斃者已多朕心深
為軫念其遺失牲畜之頭目回民等著賞銀萬兩守
城禦賊者著賞銀五千兩按名分給其擒獲賊人者
優加賞賚務令均沾恩澤十一年護理寧遠大將軍

印務張廣泗奏吐魯番回民內徙請置塔勒納

沁地

諭曰塔勒納沁無屋居回民何以棲身朕思哈密地煖

城外五堡等處為哈密回民舊駐地若將吐魯番回民暫行安置過冬令哈密札薩克轉飭本地回民就近照視似為有益哈密回民果能使之得所朕必將札薩克及回民等優加重賞尋議徙吐魯番回民置瓜州十二年所部獻可耕地之錯軍營屯田者

上以哈密皆國土且為纏頭回族世耕地不忍別置民人而其地錯官田不便聽兵民互耕

詔別給地畝銀兩及牛具穀種償之十三年撤大軍還

王大臣等議設駐防哈密及巴里坤兵各二千
陝西總督查郎阿奏哈密巴里坤路隔南山大坂兩地各留兵二千聲息難驟通請簡兵三千
屯哈密西三堡沙棗泉東北塔勒納沁并有城堡各屯兵千又哈密地熱不便牧馬請令每年播種後酌遣哈密兵千沙棗泉塔勒納沁兵各五百放牧昭莫多呼齊爾台沙子山鹿心山等處設汛烏爾圖哈達伊克溫都爾鄂什希地防

牧廠俟秋徹還又哈密南山大坂為北路屏藩
應分兵二百屯盤道設汛鹿心山松樹塘烏蘭
特爾木斯畢柳大坂等處烏克克嶺為三堡沙
棗泉要隘應分兵二百屯烏克克嶺上堡設汛
索大堡白楊溝羊堡錫喇諾爾等處塔勒納沁
河源為塔勒納沁小口應分兵二百屯河源小
堡設汛莫艾舒魯遜大坂等處別簡兵五千屯
赤金靖逆柳溝布隆吉爾橋灣五處設汛馬蓮

井子東星星硤西互為守望從之乾隆元年

詔來年免納糧給種地回民銀萬兩六年大學士查郎
阿奏哈密駐防兵請屯塔勒納沁賽巴什達哩
雅三堡各三百哈密城千二百

詔允之七年署川陝總督馬蘭泰奏塔勒納沁非衝地
三堡為哈密要隘通準噶爾居五堡中請徹塔
勒納沁兵三百歸三堡從之十一年安西提督
李繩武奏哈密三堡西南錫喇諾爾通魯克沁

及闢展路舊設汎以乏水草議徹準噶爾或潛
越其地請仍設汎兵守望又巴達什地為哈密
札薩克牧廠西北二十餘里為畢柳大坂路通
喀喇沙爾請設汎令烏拉台巴達什聲息相通

詔廷議奏錫喇諾爾汎設官兵二回兵三畢柳大坂汎

設官兵三回兵二從之十三年以安置肅州金

塔寺之吐魯番回衆告飢

諭曰肅州金塔寺安置吐魯番回人有不服水土至生

計艱窘者百餘戶經大臣等議奏請徙哈密令種地
居此項回衆向被準噶爾凌虐願徙入內地迄今二
十餘年因水土異宜積蓄者少窘迫者多若將伊等
徙於他處究恐生計有損哈密吐魯番雖部落多殊
其教則一情性相宜且哈密貝子玉素卜自伊曾祖
額貝都拉達爾漢伯克以來數世受國恩澤竭誠報
効奮勉急公教養所屬之人亦甚妥協現在哈密地
方尚有可耕餘地著將安置金塔寺回衆交貝子玉

素卜併入伊所屬旗分佐領加意撫恤令新舊回衆
和睦如一給地耕種俾永久不致失所即以此諭札
薩克貝子玉素卜知之十八年

諭曰哈密所屬賽巴什達哩雅等處屯田前給回人耕
種所交穀石以四分交官六分給與回人今聞伊等
生計稍艱著加恩將每年所獲穀石全行賞給不必
交官二十年所部兵百從西路軍征達瓦齊伊犁定
撤歸二十一年

諭曰哈密生齒日繁準噶爾全部底定哈密屬邑德都
摩亥圖古哩克地不必復設汛哨其仍給回民為世
業二十四年議撤駐防兵二千以靖逆衛兵二百瓜
州兵三百移置哈密黃墩營兵二百移置塔勒
納沁隸哈密副將轄所部旗一爵如之為郡王
品級札薩克多羅貝勒由一等達爾漢晉襲等
因表傳載記詳細昭明今道光二十六年哈密

城仍

欽差辦事大臣一員幫辦大臣一員率副將通判等
官辦理事宜而鎮守之

